

# Schnitzelbängg

## Fasnacht 2005

BängglerInnen spotten traditionell gerne gegen Zürich und befassen sich eben so gerne mit dem FCB. Wenn diese beiden Themen aufgrund des überrissenen Polizeieinsatzes vom 5.12.2004 miteinander verschmelzen, dann lassen sich die Värslibrünzler nicht lange bitten.

Die nachfolgende Zusammenstellung umfasst Analysen, Kommentare und Visionen von 53 Banggen (ohne Anspruch auf Vollständigkeit!)

### Alperööösi

Es sage d Ziircher Polizischte  
zum Baasler Aahang in dr Kische  
„Ihr deerfet sofort zugg ins Freie  
miend aifach kurz „Hopp GC“ schreie“

<http://www.fasnacht.ch/vsg/baenke.htm>

### Baijass & Omega

Z’Ziri i däm Ooperehuus isch s’Gäld bekanntlich knapp  
Trotzdäm hän si Nabucco gspielt, das findet s’Volk so glatt  
Für d’Stare hett dr Pulver glängt doch für kai bitzeli mee  
Drum nämme si als Gfangenechor halt d’Fäns vom FCB

<http://www.fasnacht.ch/vsg/baenke.htm>

### Banggomat

Hesch in dr Biiren e Schruube lugg?  
Hett d’Intelligänz e greessere Bugg?  
Bisch psychisch grangg, total uffem Rumpf,  
nit im Strumpf und gaischtig stumpf?  
Nimmsch dy denn no schampaar wichtig,  
denn bisch als Zircher Schugger richtig!

<http://www.banggomat.ch/home.htm>

### Bangg-Rott

Mit em neye Faarblaan, do lauft rund.  
No Bärn hesch nid emol e Stund,  
au no Ziri – und dert denn ney,  
bisch acht Stund uff dr Bolizey.

### Bebbi-Buebe

D SBB macht mit viel Gschrei  
Am zwelfte Dezämber dr Fahrplan nei  
S gitt viel meh Ziig als no bim alte  
Au dien si nid immer am gliiche Ort halte  
Ei Unterschiid hänn mir bereits mitbiko  
Dr FCB Fanzug blibt z Altschtätte scto

<http://www.bsg-online.ch/content/baenggler/bebbi-buebe.html>

## Blauäugige

Groobi Lehrer, frächi Schieler, Schleeger und Sadische, Aktiegauner, Dealer, Räuber, Raser und Rassische, die tryybe mir zem Bahnhofplatz und setze unsri Schmiir yy und pagge denn das ganzi Pagg – in Aextrazug uff Ziiry.

[http://www.schnitzelbankbasel.ch/neue1/Fasnacht\\_05/Blauaeugige\\_05.html](http://www.schnitzelbankbasel.ch/neue1/Fasnacht_05/Blauaeugige_05.html)

## Dipflischysser

Wenn me vierhundert Basler ka verhafte loo,  
mit ere grosse Schnuure uff d Wält isch koo,  
längt das liebi Ziircher ganz im Vertraue  
no lang nit zem e Stadion baue.

## Dropfezeller

GC – Basel z luege isch fir d Fans e Fescht  
Doch d Zircher Schugger stoppe uns in Ziri Wescht  
Mir mache das am Morgestraich hej waisch wie Geil  
Und stoppe denn dä Zug voll Schwobe scho in Weil

<http://www.fasnacht.ch/baengg-fir-basel/fasnacht05/dropfezeller/dropfezeller.htm>

## dr Edeli

Y haa au mit dämm Aextra-Zuug  
uff Ziiri welle goo  
und luege wie dr FCB  
duet GC aabe loo  
Doch s' Ainzig woo n'y deert haa gsee  
das isch hoolls doch dr Gugger  
e wilde Indianer-Danz  
vo iibregschnabbte Schugger

<http://www.bsg-online.ch/content/baengqler/edeli.html>

## Fäldschnäggli

Jä, mit Helge, Bänjo und Gitarre, sin mir uf Ziri gange,  
dört nämme uns grad 13'000 Schugger schwer in d' Zange,  
viel lieber wäre mir im Basler Wooghof ghoggt,  
und hätte denn die ganz Nacht mit em Behring duurezoggt.

[http://www.faeldschnaeggli.ch/german/baengq\\_2005.htm](http://www.faeldschnaeggli.ch/german/baengq_2005.htm)

## Fätze

D' Stadt Basel soll schyyns anders tigge, das isch nit so wichtig  
in Ziri isch es umgekeert, dert tigge si nit richtig  
Bi uns sinn d' Dierli hinter Gitter - dusse dien mir gaffe  
und z' Ziri kemme mir in Keefig und dusse wingge d' Affe

<http://www.fasnacht.ch/vsg/baenke.htm>

## Filzluus

Dr Fahrplanwäggsel isch vollzooge,  
doch sythäär dien mi Zwyyfel blooge.  
Fahr ych uff Ziri, sehn ys ko  
lehn sy mi scho wider z Altstette stoh!

[http://www.schnitzelbankbasel.ch/neue1/Fasnacht\\_05/Filzluus\\_05.html](http://www.schnitzelbankbasel.ch/neue1/Fasnacht_05/Filzluus_05.html)

## Gasladärne

Denn dien si d Fans vom FC Basel schyganiere  
und glaini Kinder gfesslet uf e Poschte fiere.  
Mir kennte wirgglig uf so bleedi Värs verzichte  
und mechte ändlig ebbis Gschejts us Ziiri brichte.

[http://www.schnitzelbankbasel.ch/neue1/Fasnacht\\_05/Gasladaerne\\_05.html](http://www.schnitzelbankbasel.ch/neue1/Fasnacht_05/Gasladaerne_05.html)

## Glettyse

S'maint e Häftling in Guantamo Bay :  
Nadyrlig sig dä Knascht e Sauerey !  
Doch haigg är's jo no guet als Taliban,  
Vergliche mit e me Basler Fuessball- Fan !

[http://www.schnitzelbankbasel.ch/neue1/Fasnacht\\_05/Glettyse\\_05.html](http://www.schnitzelbankbasel.ch/neue1/Fasnacht_05/Glettyse_05.html)

## Gliewiirmli

Thun schloot Baasel 4:1, s isch gsi e druurig Bild,  
verteilt us Fraid denn nach em Match, Läggerli ganz wild,  
in Ziiri het me s anderscht gleest, verglemmi sin die duure,  
dert bekunnsch scho vor em Spiil, Gummischroot in d Schnuure.

*[Als besonderes Bhaltis verteilen die Gliewiirmli Gummigeschosse an die ZuhörerInnen!]*

<http://www.gliewiirmli.ch/content/zeedel.html>

## Gluggersegg

Melodie: Der wilde, wilde Westen ...  
Dr wildi, wildi Weschte fooht scho voor em Hardduurm aa,  
im Äxtrazuug zem GC-Match kunnsch root-blau druurig draa.  
Jä, si sperre sogaar Kinder yy und bruuche Dräänegaas  
und daas erinnered aim doch ... si wisse scho an waas.

[http://www.schnitzelbankbasel.ch/neue1/Fasnacht\\_05/Gluggersegg\\_05.html](http://www.schnitzelbankbasel.ch/neue1/Fasnacht_05/Gluggersegg_05.html)

## Gluggsi

Dr FCB isch, ha wch vernoo  
uff Ziiri schnäll go GC schloo  
Derby stellt fescht, dr Willi Schröder  
deerd sin jo d'Schugger no vyyl blöder.

Mi Schwiigermueter holts dr Gugger  
wird abgfirt vo de Ziircher - Schugger  
doch kenne die, si nit verknurre  
die hett no viel die greeser Schnuurre.

Vo däne Schugger in Altstette  
kunnt d'Schwiigermueter au an Kette  
hätte die sy bhalte, wie währ ich froh  
wieso hänn die si wieder laufe loo?

<http://www.bsg-online.ch/content/baengqler/gluggsi.html>

## Gratz-Bürschtli

Will GC Basel nimm kaa schloo  
Dien si d Fan vor em Matsch verhafte loo!  
Dää Verglych dää isch zwoor gspunne,  
im Verhafte hänn si gwunne!

## Grienschnäbel

Mir faare uff dr Autibaan und s goot denn nimme wyter  
Mir steen ganz pletzlich immene Stau, das isch jo zimmlig schyter.  
Faarsch aber lieber mit em Zuug, gherch zue dä Optimischte  
In Ziiri styggsch zem Waage us und landisch grad in dr Kische.

## Guufekissi

Mir faare mit dr SBB dur's scheene Schwyzerland.  
D'Sunne schynt, mir fraye-n-is, alli mitenand.  
Mir gniesse's und es isch so scheen, dass me's kuum verkraftet.  
Mir hänn is soo uff Ziiri gfrayt, denn hett me-n-is verhaftet.

<http://www.fasnacht.ch/vsg/baenke.htm>

## Hanslimaa

Kirche vo usse, Bäärke vo unde und Baize vo inne,  
beachtisch die Reegle no foosch nie aa spinne.  
Jetz gits non e neii Reegle ooni Quatsch,  
gang nie immen Äxdrazug an e Match!

[http://www.schnitzelbankbasel.ch/neue1/Fasnacht\\_05/Hanslimaa\\_05.html](http://www.schnitzelbankbasel.ch/neue1/Fasnacht_05/Hanslimaa_05.html)

## Hooseglunggi

Do wottschi an Match - nimmsch nit dr Flug  
Uff Ziiri - muesch in Äxtra-Zug  
Me fiehrt Di ab mit Kabelbinder  
Der by e huffe glaini Kinder  
Me loht die Stadt verbarikadiere  
Dass nit alli sehn - wie si verliere

<http://www.fasnacht.ch/vsg/baenke.htm>

## Käller Bangg

Statt an Matsch grad in Knascht, das isch doch Bedrug  
jä waisch dorum haisst dä doch sicher Äxtrazug.

[http://home.datacomm.ch/kaellerbangg/kaeller\\_bangg\\_2005.htm](http://home.datacomm.ch/kaellerbangg/kaeller_bangg_2005.htm)

## Luuszäpfe

Die Schugger in Ziiri kann ych guet verstoo,  
Sie fange die Basler und leen sie nimm goo.  
Sie wänn sie grad bhalte, und das liggt do dra:  
Eso stiggt in Ziiri der IQ stail aa.

<http://www.fasnacht.ch/vsg/baenke.htm>

## Mässmögge

Wieso hän Ziircher Schugger so viil Basler gfange gnoh  
Und jede und jedi untersueche loh  
Si nämme die Probe dass wurdi loone  
Zem Gentechnisch neyi GC-Spieler z'kloone.

<http://www.fasnacht.ch/vsg/baenke.htm>

## Matratze- schooner

D'Frau Iseli paggt d'Koffere und isch am schwitze  
denn froggt si no d'Noochbere – eb si d'Blueme wurd spritze  
em Briefträger sait si, är sell d'Poscht zrugg bhalte  
jä was isch – goot 's in d'Ferie – froggt denn ihre Alte  
he nai – aber mer sinn doch – wohrschyns e Zytlang nit doo  
mir wänn doch ane Matsch uff Ziiri goo.

<http://www.fasnacht.ch/vsg/baenke.htm>

## Max + Moritz

Y hogg im Zug Richtig Ziiri, due d'Landschaft gniesse  
und ha aigentlig nur welle ans Knabeschiesse  
z'Aarau bin y mit mim Öpfel in Spyyswaage gsässe  
Und han en z'Altstätte in de Handschälle fertig gässe

[http://www.fasnacht.ch/baengg-fir-basel/fasnacht05/max\\_moritz/max\\_moritz.htm](http://www.fasnacht.ch/baengg-fir-basel/fasnacht05/max_moritz/max_moritz.htm)

## Passe-vite

Uff 600 Fäns wird ummeghaggt,  
si wärde verhaftet und als Päggli verpaggt.  
S isch s erschte Mool, dass e soone Horde  
vo Zircher ächt isch gfesslet worde.

[http://www.schnitzelbankbasel.ch/neue1/Fasnacht\\_05/Passevite\\_05.html](http://www.schnitzelbankbasel.ch/neue1/Fasnacht_05/Passevite_05.html)

## die Penetrante

Der glaini Fritzli duet de Ziircher Schugger schriibe,  
äär haig doch nie soo lang in Ziiri welle bliibe.  
Die wuorde s näggscht mool gscheiter d Fuesballmannschaft  
schnappe  
denn kriege d Ziircher aimool weeniger uff d Kappe

<http://www.penetrante.ch/pd/index.htm>

## Peperoni

An der Fasnacht – das Joor im Hornig,  
do Sorge mir z'Basel denn sälber fir Ornig!  
D'Zircher, wo im Äxtraazuug, wän koo zem Ummelungere,  
stelle mer z'Muttenz uf e Stumpeglais und leen si dert verhungere.

[http://www.schnitzelbankbasel.ch/neue1/Fasnacht\\_05/Peperoni\\_05.html](http://www.schnitzelbankbasel.ch/neue1/Fasnacht_05/Peperoni_05.html)

## Pierrot

8 zue 1 griegt GC Schnitte,  
und hänn bis hytte drunter glitte,  
au Zirche-Schmier het sich derno,  
uff s glyche Niveau abegloo.

[http://www.schnitzelbankbasel.ch/neue1/Fasnacht\\_05/Pierrot\\_05.html](http://www.schnitzelbankbasel.ch/neue1/Fasnacht_05/Pierrot_05.html)

## Plauschwurzle

Vo Westernhelde grieggsch uff d Kappe  
Begebnisch dääne bisch am Arsch  
Soo Galgeveegel dien di schnappe  
Wenn d mit em Zug nach Ziiri faarsch

<http://www.fasnacht.ch/baengg-fir-basel/fasnacht05/plauschwurzle/plauschwurzle.htm>

## Rätschbääse

400 Basler Fans verhafte – dass die sich nit scheniere  
do sott doch ooni z studiere dr WWF interviere  
400 Fans abfiere, das kennt GC nie bassiere  
die miessten alli Fanclubs samt dr Mannschaft interniere

<http://www.bsg-online.ch/content/baengqler/raetschbaeaeese.html>

## Rotstab-Bank

...Denn hän mir die ganzi Sach verkräftet  
denn wär ohni dass är muess nach Züri goht, dä ghört verhaftet.

## Schnaabel- wetzler

Em Fritzli sy Mamme phaggt s Ruggseggli yy:  
Zwai Riebli, drey Biire, au s Lätzli kunnt dryy.  
Eso blyybt dr Fritzli sicher gsund,  
wenn är in Ziri statt an GC-Matsch in d Kische kunnt.

*[dr Helge zaiggt Buschis]*

2'890 Gramm

3'280 Gramm

Bim dritte sinns no zää Gramm meh:

Dasch d Zircher Fahndigs-Lische vo de Fääns vom FCB.

[http://www.schnitzelbankbasel.ch/neue1/Fasnacht\\_05/Schnaabelwetzler\\_05.html](http://www.schnitzelbankbasel.ch/neue1/Fasnacht_05/Schnaabelwetzler_05.html)

## Schmiirfingge

Hesch mit Kinder z'tue  
Löön Di nit in Rue  
Due si doch nach Ziiri schigge  
So kasch gmietlig umme spaziere

Ziircher Schugger dient sich nit beschwääre  
Schnappe alli, wie wenn's Verbrächer wääre

<http://www.bsg-online.ch/content/baengqler/schmiirfingge.html>

## Schooffsuuri

Dr Schampe mi Frind – wo sunsch gar nyt vergisst,  
Isch un'gsinnt nimm umme – är gilt als vermisst.  
Am Mittwuch do driff en - froog : was soll dä Quatsch ?  
Do maint är, är syyg nur in Ziiri an Matsch.

[http://www.schnitzelbankbasel.ch/neue1/Fasnacht\\_05/Schooffsuuri\\_05.html](http://www.schnitzelbankbasel.ch/neue1/Fasnacht_05/Schooffsuuri_05.html)

## Schorsch

Jeedi Nacht ha ich e Alpdraum ganz e schlimme  
immer wiider höör ich fremdi, böösi Stimme  
ich syg uffem Wäg zur Höll und nümme z rette  
do ha ich gwüsst bisch uffem Baanhöf vo Altstette

<http://www.bsg-online.ch/content/baenggler/schorsch.html>

## Schregg- schruube

D'Zircher Schugger - bitte sehr  
beläübe dr Zircher Fremdeverkeer:  
statt yber fäälendi Tourischte z'glaage  
holt me si z'Basel - per Ysebaanwaage !

<http://www.bsg-online.ch/content/baenggler/schreggschruube.html>

## Singvogel

Damit me d Fasnacht ryybiglos ka duurefiehre,  
isch s Polizeidepartemänt am Disponiere:  
Me losst zer Sicherhait am Määntig vor de Viere  
im Bahnhof Augscht der Ziircher Äxtrazug blockiere.

Si ziehn mit Gschrei, mit Lyychtpedarde und mit Fähne  
in d Schlacht vo Ziiri, so wie doomools z Sämpach ääne.  
Doch drotz de Goal vo Rossi, Huggel, Carignano  
schyynt mir s Ergäbnis eenter so wie z Marignano.

[http://www.schnitzelbankbasel.ch/neue1/Fasnacht\\_05/Singvogel\\_05.html](http://www.schnitzelbankbasel.ch/neue1/Fasnacht_05/Singvogel_05.html)

## s spitzig Ryssblei

Z'erscht spritze sy mit Pfäfferspray,  
denn zwinge sy mi grad uff d' Gnei.  
Jetzt binde sy mir beidi Händ uff e' Rugge,  
um e' Hals grieg ych e' Blaschdiggugge.  
Nei ych bi nit in däm Zug uff Ziri gsässe  
Ych ha nur am Velo 's Lyecht vergässe.

[http://www.fasnacht.ch/baengg-fir-basel/fasnacht05/spitzig\\_ryssblei/spitzig\\_ryssblei.htm](http://www.fasnacht.ch/baengg-fir-basel/fasnacht05/spitzig_ryssblei/spitzig_ryssblei.htm)

## Spyrhind

Ziircher Schugger kenne Baasler Spoortfrind nit vergrafte.  
Drum dien si grad e ganze Zuug mit gross und glai verhafte.  
Am Määrtplatz pheeble geschtert znacht drei Drummler uff dr  
Physchte.  
Sythäär hogge d Stainlemer alli in dr Kische.

<http://www.spyrhind.ch.vu/>

## Staubwolgge

Dumm und blöd und dumm und blöd und no viel dümmer,  
Dumm und blöd und dumm und blöd und gar no dümmer.  
Unseri Schieler sin nach Pisa nid die Beschte,  
aber dient joo nie Zircher Schugger welle teschte.

<http://www.bsg-online.ch/content/baenggler/staubwolgge.html>

## Striggede

Dr glaini Tim wird fescht gnoh  
well är d Fahne schwingt zue brait!  
Und s Grittli wird grad gfesslet,  
wells e Yakin Lybli draht!

S glai Helen kunnt in Haft,  
s het s rot-blau Jojo im Gepäck!  
Em Hansli nimmt dr Staatsanwalt  
dr rot-blau Glugger wäg,

Und s Maieli isch sächs, äs singt  
no s Basler Lied im Taggt  
bevors dr Schugger mit em  
Haftbefähl am Schuelsagg paggt!

D Regierig z Ziri windet sich  
und sait, s dät ihne laid!  
Derby isch es doch aifach gsait:  
Die hän dängg s 8:1 nid verdraht!

<http://www.comite2000.ch/schnitzelbaengq/index.shtm>

## Super Bebbi

Entschuldige Syy, das isch der Sunderzuug noo Ziiri  
Dä an FCB Matsch, scho mache d'Hangschälle ratsch  
Ych ha gschwätzt mit dääne Heere, doch ych ka mii nit weere  
Es nimmt mi uss de Hoose, doch Sy dien nit zueloose  
Ych ha doch dääne gsait, es duet mir wiirglic laid  
He jo derno ich schweer, ych bi der Kondiggteer

<http://www.fasnacht.ch/vsg/baenke.htm>

## Syydiane

Dr Schugger Binz vom Zircher Boschte  
Bim Stadion ääne draa  
Lytet ganz verzwiyyflet  
Synere Schuggerchefin aa  
Y ha dä Basler Hooligan  
Drei gueti Stund vernoo  
Aber dä duet numme briele  
„Wott haim zem Mami goo“

## Tourischte

Ob's in Ziiri e neii Fussballarena git  
Intrèsiert uns vier wiirgglic nit  
Aber gfalle würd das unsere Kinder  
Den deert gits gratis Kabelbinder

<http://www.fasnacht.ch/vsg/baenke.htm>



## Uffeschduehler

F-C-B mir liebe dy  
Sinn immer fir dy doo  
Ai Wunsch jo waisch dä hättemer  
Und dä – dä wääri soo  
Muesches aifach duuresetze  
S' wääri schampaar nätt  
Wenn me bi de Uswäärtsschpiel  
In dr Zälle Fäärnseeh hätt

<http://www.bsg-online.ch/content/baenggler/uffeschduehler.html>

## die Verlumpte

Syt s Schällemätteli zue het miesse mache,  
fääle Zälle zum die Gfäärliche z bewache,  
jetzt loot me si alli zum Blatz kenne spaare,  
als FC Basel-Fans im Zug uff Ziiri faare.

<http://www.bsg-online.ch/content/baenggler/verlumpti.html>

## Die Verschiffte

Nur der Zug uf Ziiri – das isch ney  
Haltet viil viil z frieh – s hett Polizei!  
Uns isch das egal – ob z spoot oder z frieh  
Nach Ziiri – gehn mir nie!

## Weggli-Buebe

e Neubau mit fünf Gummizälle  
e Zwinger no – fir d'Hünd wo bälle  
bym Zircher Schadionprojäggt  
dr Fidlebirger d'Finger schläggt  
als neye Schtandort wähle die beschtimmt – mir wette  
dr grossi Parkplatz näbem Bahnhof – in Altschtette

<http://www.bsg-online.ch/content/baenggler/wegglibuebe.html>

## Zahnstocher

Do letschti froggt so ain, wo sammlet, was mer fände  
zum vyyle Sammler hüt und öb au miir no spände  
für sy Winterhilfprojäggt "Ein Herz für Kinder"  
für neui Wasserwärfer, Seil und Kabelbinder!

[http://www.schnitzelbankbasel.ch/neue1/Fasnacht\\_05/Zahnstocher\\_05.html](http://www.schnitzelbankbasel.ch/neue1/Fasnacht_05/Zahnstocher_05.html)

## Zwaiierlizwigger

Wie kaa me nur so bleed si wie die Bolizische  
entfiere die e Zuug voll Bebbi Terrorische  
als Basler wingge mir die groose Zircher Schnuure  
grad ooni Halt bis zu de Schwoobe duure

<http://www.fasnacht.ch/baengg-fir-basel/fasnacht05/Zwaiierlizwigger/Zwaiierlizwigger.htm>

Folgende bekannte Bängg haben ebenfalls Verse zum Thema vorgetragen. Leider fehlen uns die Zettel ...

- Die Aabrennte
- D Giftnuudle
- Die Gsalzene
- Joggeli
- Kellerassle
- Muulwiirf
- Saggstargg
- D Vogelschychi

Dazu kommen noch viele „wilde“ Bängg ...

Wer uns helfen will, die Sammlung zu komplettieren, darf dies gerne tun.  
Mail an [basel@augenauf.ch](mailto:basel@augenauf.ch)